

საქართველოს იუსტიციის უმაღლესი საბჭოს
გადაწყვეტილება

მოსამართლეობის საკვალიფიკაციო გამოცდის ჩატარების წესისა და საკვალიფიკაციო საგამოცდო
პროგრამის დამტკიცების შესახებ

1. „საერთო სასამართლოების შესახებ“ საქართველოს ორგანული კანონის 52-ე მუხლის პირველი პუნქტისა და 53-ე მუხლის მე-2 პუნქტის საფუძველზე დამტკიცდეს:

- ა) მოსამართლეობის საკვალიფიკაციო გამოცდის ჩატარების წესი (დანართი 1);
- ბ) მოსამართლეობის საკვალიფიკაციო საგამოცდო პროგრამა (დანართი 2).

2. ძალადაკარგულად გამოცხადდეს „მოსამართლეობის საკვალიფიკაციო გამოცდის ჩატარების წესისა და საკვალიფიკაციო საგამოცდო პროგრამის დამტკიცების შესახებ“ საქართველოს იუსტიციის უმაღლესი საბჭოს 2007 წლის 25 სექტემბრის №1/207-2007 გადაწყვეტილება.

3. ეს გადაწყვეტილება ამოქმედდეს მიღებისთანავე.

გიორგი მიქაუტაძე

საქართველოს იუსტიციის
უმაღლესი საბჭოს მდივანი

მოსამართლეობის საკვალიფიკაციო გამოცდის ჩატარების წესი

თავი I.

ზოგადი დებულებანი

მუხლი 1. საკვალიფიკაციო გამოცდის მიზნები

მოსამართლეობის საკვალიფიკაციო გამოცდის (შემდგომში - საკვალიფიკაციო გამოცდა) მიზანია მაღალკვალიფიციური იურისტების შერჩევა შემდგომში იუსტიციის უმაღლეს სკოლაში იუსტიციის მსმენელთა მისაღებად გამოცხადებულ კონკურსში მონაწილეობის მისაღებად.

მუხლი 2. საკვალიფიკაციო გამოცდის ჩატარების უფლების მქონე პირები

1. საკვალიფიკაციო გამოცდის ჩატარების უფლება ეძლევა საქართველოს ქმედუნარიან მოქალაქეს ოცდახუთი წლის ასაკიდან, თუ მას აქვს უმაღლესი იურიდიული განათლება და ფლობს სახელმწიფო ენას.

2. ამ წესის მიზნებისთვის უმაღლესი იურიდიული განათლების მქონედ ითვლება:

ა) პირი, თუ მას დამთავრებული აქვს სახელმწიფო უმაღლესი სასწავლებლის იურიდიული ფაკულტეტის სრული კურსი სპეციალობით „სამართლისმცოდნეობა“ და სახელმწიფო საგამოცდო კომისიის მიერ მინიჭებული აქვს „იურისტის“ კვალიფიკაცია;

ბ) პირი, რომელსაც აკრედიტებული უმაღლესი საგანმანათლებლო დაწესებულების ან ახალდაფუძნებული ლიცენზირებული უმაღლესი საგანმანათლებლო დაწესებულების მიერ მინიჭებული აქვს ბაკალავრის, დიპლომირებული სპეციალისტის ან მაგისტრის უმაღლესი აკადემიური ხარისხი სამართალმცოდნეობაში. მაგისტრის აკადემიური ხარისხის მქონე პირი უნდა ფლობდეს ბაკალავრის აკადემიურ ხარისხსაც სამართალმცოდნეობაში;

გ) პირი, რომელსაც ავტორიზებული უმაღლესი საგანმანათლებლო დაწესებულების მიერ მინიჭებული აქვს სამართლის ბაკალავრის ან სამართლის მაგისტრის აკადემიური ხარისხი. სამართლის მაგისტრის აკადემიური ხარისხის მქონე პირი უნდა ფლობდეს სამართლის ბაკალავრის აკადემიურ ხარისხსაც.

3. პირი, რომელიც სავარაუდოდ ვერ აკმაყოფილებს ამ მუხლის მე-2 პუნქტით დადგენილ მოთხოვნებს, საკვალიფიკაციო გამოცდაზე დაიშვება უმაღლესი იურიდიული განათლების დამადასტურებელი დოკუმენტის ნამდვილობის დადასტურების შესახებ სსიპ – განათლების ხარისხის განვითარების ეროვნული ცენტრის მიერ გაცემული დოკუმენტის წარმოდგენის შემთხვევაში.

4. პირი, რომელსაც უმაღლესი იურიდიული განათლება მიღებული აქვს უცხოეთში, საკვალიფიკაციო გამოცდაზე დაიშვება განათლების აღიარების შესახებ სსიპ – განათლების ხარისხის განვითარების ეროვნული ცენტრის მიერ გაცემული დოკუმენტის წარმოდგენის შემთხვევაში.

მუხლი 3. კანდიდატის რეგისტრაცია და საკვალიფიკაციო გამოცდაში მონაწილეობის საფასური

1. საკვალიფიკაციო გამოცდაზე დაშვების მიზნით კანდიდატთა რეგისტრაციის ვადას განსაზღვრავს საქართველოს იუსტიციის უმაღლესი საბჭო, რომელიც არ უნდა იყოს 7 სამუშაო დღეზე ნაკლები. რეგისტრაციის ვადის გასვლის შემდეგ წარმოდგენილი განცხადებები არ მიიღება.

2. კანდიდატი რეგისტრირდება საერთო ან ერთ-ერთი სპეციალიზაციის მიხედვით.

3. საკვალიფიკაციო გამოცდის ჩაბარების მსურველი რეგისტრირდება საქართველოს იუსტიციის უმაღლესი საბჭოს ოფიციალური ვებგვერდის საშუალებით. რეგისტრაციისას პირმა უნდა ატვირთოს შემდეგი საბუთები:

ა) უმაღლესი იურიდიული განათლების დამადასტურებელი დოკუმენტი სანოტარო წესით დამოწმებული სახით (დამოწმება არ მოითხოვება ამ წესის მე-2 მუხლის მე-3 და მე-4 პუნქტებით გათვალისწინებული სსიპ - განათლების ხარისხის განვითარების ეროვნული ცენტრის მიერ გაცემული დოკუმენტის წარმოდგენის შემთხვევაში);

ბ) პირადობის დამადასტურებელი მოწმობა;

გ) ფერადი ფოტოსურათი ელექტრონული ფორმით.

4. ამ მუხლის მე-3 პუნქტით გათვალისწინებული დოკუმენტების არასრულად წარდგენის შემთხვევაში, კანდიდატის რეგისტრაცია უარყოფილი იქნება.

5. თუ კანდიდატი ვერ აკმაყოფილებს წაყენებულ მოთხოვნებს ან წარდგენილი საბუთები არ შეესაბამება დადგენილ წესს, საკვალიფიკაციო საგამოცდო კომისიის თავმჯდომარე იღებს გადაწყვეტილებას კანდიდატის რეგისტრაციის დადასტურების უარყოფის შესახებ, რაც კანდიდატს ეცნობება ელექტრონული სისტემის მეშვეობით.

6. კანდიდატის რეგისტრაციის დადასტურების შემთხვევაში პირი საკვალიფიკაციო გამოცდაში მონაწილეობისათვის იხდის საფასურს 200 ლარის ოდენობით, რომელიც ირიცხება საქართველოს იუსტიციის უმაღლეს საბჭოსთან არსებული საჯარო სამართლის იურიდიული პირის - საერთო სასამართლოების დეპარტამენტის საკუთარი შემოსავლების ანგარიშზე.

მუხლი 4. საკვალიფიკაციო გამოცდის დანიშვნა და ჩატარების ვადები

საკვალიფიკაციო გამოცდის ჩატარების ფორმა (საერთო და/ან სპეციალიზაციის მიხედვით), თარიღი, აგრეთვე საკვალიფიკაციო გამოცდასთან დაკავშირებული ორგანიზაციული ღონისძიებების განხორციელების ვადები განისაზღვრება საქართველოს იუსტიციის უმაღლესი საბჭოს მიერ. აღნიშნულის შესახებ ინფორმაცია საკვალიფიკაციო გამოცდის ჩატარებამდე არანაკლებ ერთი თვით ადრე ქვეყნდება საქართველოს იუსტიციის უმაღლესი საბჭოს ვებგვერდზე.

მუხლი 5. გამოცდის ჩატარების ენა

საკვალიფიკაციო გამოცდა ტარდება სახელმწიფო ენაზე.

მუხლი 6. საკვალიფიკაციო გამოცდა

1. საკვალიფიკაციო გამოცდა ტარდება საერთო და ერთ-ერთი სპეციალიზაციის მიხედვით.

2. სპეციალიზაცია ხდება სამოქალაქო და ადმინისტრაციული სამართლისა და სისხლის სამართლის დარგებში.

3. საერთო საკვალიფიკაციო გამოცდა ტარდება შემდეგ საგნებში:

- ა) საკონსტიტუციო სამართალი;
- ბ) სისხლის სამართალი;
- გ) სისხლის სამართლის პროცესი;
- დ) სამოქალაქო სამართალი;
- ე) სამოქალაქო სამართლის პროცესი;
- ვ) ადმინისტრაციული სამართალი;
- ზ) ადმინისტრაციული სამართლის პროცესი;

თ) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები.

4. სამოქალაქო და ადმინისტრაციული სამართლის სპეციალიზაციით გამოცდა ტარდება შემდეგ საგნებში:

- ა) საკონსტიტუციო სამართალი;
- ბ) სამოქალაქო სამართალი;
- გ) სამოქალაქო სამართლის პროცესი;
- დ) ადმინისტრაციული სამართალი;
- ე) ადმინისტრაციული სამართლის პროცესი;

ვ) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები.

5. სისხლის სამართლის სპეციალიზაციით გამოცდა ტარდება შემდეგ საგნებში:

- ა) საკონსტიტუციო სამართალი;
- ბ) სისხლის სამართალი;
- გ) სისხლის სამართლის პროცესი;

დ) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები.

მუხლი 7. საკვალიფიკაციო გამოცდის ეტაპები და შედეგების გამოცხადება

1. საკვალიფიკაციო გამოცდა ტარდება ორ ეტაპად: თავდაპირველად ბარდება ტესტური გამოცდა, ხოლო შემდეგ - წერითი გამოცდა.

2. წერით გამოცდაზე დაიშვება მხოლოდ ის პირი, რომელიც წარმატებით ჩააბარებს ტესტურ გამოცდას.

3. საკვალიფიკაციო გამოცდა ჩაბარებულად ითვლება ტესტური და წერითი გამოცდის წარმატებით ჩაბარების შემთხვევაში.

4. როგორც ტესტური, ისე წერითი გამოცდის შედეგები ელექტრონული სისტემის მეშვეობით ინდივიდუალურად ეცნობება ყველა კანდიდატს, ხოლო გამოცდის შედეგების შესახებ სტატისტიკური ინფორმაცია განთავსდება საქართველოს იუსტიციის უმაღლესი საბჭოს ოფიციალურ ვებგვერდზე.

თავი II.

ტესტური გამოცდა

მუხლი 8. საგამოცდო ტესტი

1. ტესტური გამოცდა ტარდება ელექტრონული პროგრამის საშუალებით.

2. საგამოცდო ტესტი შეიცავს საკვალიფიკაციო გამოცდისათვის გათვალისწინებული სამართლის შესაბამისი დარგების მიხედვით შედგენილ ას არჩევით პასუხიან დავალებას, რომელთა რაოდენობა დგინდება შემდეგნაირად:

ა) საერთო სპეციალიზაციის შემთხვევაში:

ა.ა) საკონსტიტუციო სამართალი - 10 (ათი) დავალება;

ა.ბ) სისხლის სამართალი - 15 (თხუთმეტი) დავალება;

ა.გ) სისხლის სამართლის პროცესი - 15 (თხუთმეტი) დავალება;

ა.დ) სამოქალაქო სამართალი - 15 (თხუთმეტი) დავალება;

ა.ე) სამოქალაქო საპროცესო კოდექსი - 15 (თხუთმეტი) დავალება;

ა.ვ) ადმინისტრაციული სამართალი - 13 (ცამეტი) დავალება;

ა.ზ) ადმინისტრაციული სამართლის პროცესი - 7 (შვიდი) დავალება;

ა.თ) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები - 10 (ათი) დავალება;

ბ) სამოქალაქო და ადმინისტრაციული სამართლის დარგში სპეციალიზაციის შემთხვევაში:

ბ.ა) საკონსტიტუციო სამართალი - 10 (ათი) დავალება;

ბ.ბ) სამოქალაქო სამართალი - 25 (ოცდახუთი) დავალება;

ბ.გ) სამოქალაქო საპროცესო სამართალი - 25 (ოცდახუთი) დავალება;

ბ.დ) ადმინისტრაციული სამართალი - 20 (ოცი) დავალება;

ბ.ე) ადმინისტრაციული სამართლის პროცესი - 10 (ათი) დავალება;

ბ.ვ) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები - 10 (ათი) დავალება;

გ) სისხლის სამართლის დარგში სპეციალიზაციის შემთხვევაში:

გ.ა) საკონსტიტუციო სამართალი - 10 (ათი) დავალება;

გ.ბ) სისხლის სამართალი - 40 (ორმოცი) დავალება;

გ.გ) სისხლის სამართლის პროცესი - 40 (ორმოცი) დავალება;

გ.დ) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები - 10 (ათი) დავალება.

3. დავალებები თავისი სირთულის მიხედვით იყოფა სამ დონედ: მარტივი, საშუალო და რთული. საგამოცდო დავალებების საერთო რაოდენობის 20% შეადგენს რთულ, 65% - საშუალო, ხოლო 15% - მარტივი კატეგორიის დავალებას.

4. დავალების ყოველი საკითხი შედგება ორი ნაწილის, პირობისა და ოთხი სავარაუდო პასუხისაგან. დავალების ოთხი პასუხიდან სწორია მხოლოდ ერთი. გამოსაცდელმა უნდა აღნიშნოს სწორი პასუხი.

მუხლი 9. დავალების შეფასება

1. ყოველ დავალებაზე სწორი პასუხი ფასდება 1 (ერთი) ქულით, არასწორი პასუხი კი - 0 (ნული) ქულით.

2. თუ არც ერთი პასუხი არ არის აღნიშნული, დავალების ამოხსნა შეფასდება 0 (ნული) ქულით.

3. ტესტური გამოცდის მინიმალური შეფასება არის 0 (ნული) ქულა, ხოლო მაქსიმალური შეფასება - 100 (ასი) ქულა.

მუხლი 10. გამსვლელი ქულა

გამოსაცდელი, რომელიც ტესტურ გამოცდაში დააგროვებს 75 (სამოცდათხუთმეტ) ან მეტ ქულას, გადის შემდეგ ეტაპზე და მას უფლება აქვს ჩააბაროს წერიტი გამოცდა.

მუხლი 11. საგამოცდო დრო

1. ტესტური გამოცდის ჩასაბარებლად გამოსაცდელს ეძლევა ხუთი საათი. დროის ამოწურვის შემდეგ პროგრამა აფიქსირებს და აფასებს იმ პასუხებს, რომლის აღნიშვნაც მოახდინა გამოსაცდელმა.
2. გამოსაცდელები მიიღებენ გაფრთხილებას საგამოცდო დროის ამოწურვის შესახებ ორჯერ – დროის დამთავრებამდე 30 წუთით ადრე და 15 წუთით ადრე.

მუხლი 12. საგამოცდო ტესტის შედგენა

1. ელექტრონული პროგრამა უზრუნველყოფს საგამოცდო ტესტის თითოეული კანდიდატისათვის ინდივიდუალურად შედგენას.
2. ტესტის შედგენისას უნდა იქნეს დაცული თანმიმდევრობა, საკვალიფიკაციო გამოცდისათვის გათვალისწინებული სამართლის შესაბამისი დარგებისა და ამ დარგებში დავალებების სირთულის მიხედვით.

მუხლი 13. საკანონმდებლო მასალის გამოყენების აკრძალვა

1. ტესტური გამოცდის განმავლობაში გამოსაცდელს ეკრძალება ნორმატიული აქტების, კანონთა კომენტარების, სახელმძღვანელოების ან სხვა ანალოგიური მასალის, ასევე აუდიო ან ტექნიკური საშუალებების (მათ შორის, მობილური ტელეფონების) გამოყენება.
2. გამოსაცდელი, რომელიც შემჩნეული იქნება ამ მასალის ან ტექნიკური საშუალების გამოყენებაში, მოიხსნება გამოცდიდან და დაეწერება შეფასება 0 (ნული).

მუხლი 14. ტესტური გამოცდის შედეგების შემოწმება

1. ტესტური გამოცდის პასუხები მოწმდება ელექტრონული პროგრამის საშუალებით და გამოცდის დასრულებისთანავე ხდება ცნობილი გამოსაცდელისათვის.
2. ტესტური გამოცდის პასუხების ფურცლის დამოწმებული ეგზემპლარი გადაეცემა გამოსაცდელს.

თავი III.

წერიტი გამოცდა

მუხლი 15. წერიტი გამოცდა

1. წერიტი გამოცდა ტარდება ელექტრონული პროგრამის საშუალებით.
2. წერიტი გამოცდის საკითხები შეიცავს საკვალიფიკაციო გამოცდისათვის გათვალისწინებული სამართლის შესაბამისი დარგების მიხედვით შედგენილ 5 ღია პასუხიან

დავალებას, რომელიც დგება ელექტრონული სისტემის მეშვეობით თითოეული კანდიდატისათვის ინდივიდუალურად და რომელთა რაოდენობა განისაზღვრება შემდეგნაირად:

- ა) საერთო სპეციალიზაციის შემთხვევაში:
 - ა.ა) სისხლის სამართალი - 1 (ერთი) დავალება;
 - ა.ბ) სისხლის სამართლის პროცესი - 1 (ერთი) დავალება;
 - ა.გ) სამოქალაქო სამართალი და პროცესი - 1 (ერთი) დავალება;
 - ა.დ) ადმინისტრაციული სამართალი და პროცესი - 1 (ერთი) დავალება;
 - ა.ე) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები - 1 (ერთი) დავალება;
 - ბ) სამოქალაქო და ადმინისტრაციული სამართლის დარგში სპეციალიზაციის შემთხვევაში:
 - ბ.ა) სამოქალაქო სამართალი - 1 (ერთი) დავალება;
 - ბ.ბ) სამოქალაქო საპროცესო სამართალი - 1 (ერთი) დავალება;
 - ბ.გ) ადმინისტრაციული სამართალი - 1 (ერთი) დავალება;
 - ბ.დ) ადმინისტრაციული საპროცესო სამართალი - 1 (ერთი) დავალება;
 - ბ.ე) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები - 1 (ერთი) დავალება;
 - გ) სისხლის სამართლის დარგში სპეციალიზაციის შემთხვევაში:
 - გ.ა) სისხლის სამართალი - 2 (ორი) დავალება;
 - გ.ბ) სისხლის სამართლის პროცესი - 2 (ორი) დავალება;
 - გ.გ) ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები და შეთანხმებები - 1 (ერთი) დავალება.
3. დავალების ამოხსნის დროს გამოსაცდელმა უნდა შეძლოს სამართლებრივი კვალიფიკაცია - სამართლებრივი ნორმების შეფარდება ამოსახსნელ დავალებაში მოცემულ სიტუაციასთან, ასევე დავალების ამგვარი გადაწყვეტის დასაბუთება როგორც თეორიული, ისე პრაქტიკული არგუმენტებით.

მუხლი 16. წერიტი გამოცდის ჩაბარებაზე უფლებამოსილი პირები

წერიტი გამოცდა ტარდება ტესტური გამოცდის შემდეგ და მასზე დაიშვებიან მხოლოდ ის კანდიდატები, რომლებმაც წარმატებით ჩააბარეს ტესტური გამოცდა.

მუხლი 17. წერიტი გამოცდის დავალებების შეფასება

1. ყოველი დავალება ფასდება ხუთქულიანი სისტემით. მაქსიმალური შეფასება არის 5 (ხუთი) ქულა, ხოლო მინიმალური - 0 (ნული) ქულა.
2. ქულათა მაქსიმალური რაოდენობა შეადგენს 25 (ოცდახუთ) ქულას, ხოლო მინიმალური - 0 (ნულ) ქულას.

მუხლი 18. წერიტი გამოცდის შედეგები

წერიტი გამოცდა ჩაბარებულად ითვლება, თუ გამოსაცდელი დააგროვებს სულ ცოტა 15 (თხუთმეტი) ქულას.

მუხლი 19. წერიტი გამოცდის ჩაბარების დრო

1. წერიტი გამოცდის ჩასაბარებლად გამოსაცდელს ეძლევა ექვსი საათი. ელექტრონული პროგრამა აფიქსირებს საგამოცდო დროის დასრულებას და ინახავს წერიტ ნამუშევარს.

2. გამოსაცდელეები მიიღებენ გაფრთხილებას საგამოცდო დროის ამოწურვის შესახებ ორჯერ – დროის დამთავრებამდე 30 წუთით ადრე და 15 წუთით ადრე.

მუხლი 20. საკანონმდებლო მასალის გამოყენების უფლება

1. წერიტი გამოცდის განმავლობაში დასაშვებია ნორმატიული მასალის გამოყენება.

2. გამოსაცდელს ეკრძალება კანონთა კომენტარების, სახელმძღვანელოებისა და სხვა სასწავლო მასალის გამოყენება. გამოსაცდელი, რომელიც შემჩნეული იქნება ამ მასალის გამოყენებაში, მოიხსნება გამოცდიდან და დაეწერება შეფასება 0 (ნული).

მუხლი 21. ნაშრომის გასწორება

1. საკვალიფიკაციო საგამოცდო კომისიისათვის ნაშრომის წარდგენა ხდება ნაბეჭდი სახით.

2. ყოველ დავალებას, ერთმანეთისაგან დამოუკიდებლად, წინასწარ შედგენილი შეფასების სქემის მიხედვით, ასწორებს საგამოცდო კომისიის ორი წევრი - მოცემული დარგის ორი სპეციალისტი. დავალების შეფასება, თუ ნიშნებს შორის სხვაობა არ აღემატება ერთს, ხორციელდება კომისიის წევრთა შეთანხმებით და საბოლოო ქულა დასტურდება კომისიის წევრთა ხელმოწერით, ხოლო თუ ნიშნებს შორის სხვაობა აღემატება ერთს, შეფასებისას გადამწყვეტია საკვალიფიკაციო საგამოცდო კომისიის თავმჯდომარის პოზიცია. წერიტი გამოცდის შედეგების შემოწმებისას დაცულია გამოსაცდელისა და გამომცდელის ორმხრივი ანონიმურობის პრინციპი.

3. ნაშრომის გასწორებისა და იდენტიფიკაციის შემდეგ გამოცდის შედეგები შეიტანება საგამოცდო უწყისში და დასტურდება საკვალიფიკაციო საგამოცდო კომისიის თავმჯდომარის ხელმოწერით.

თავი III.

საკვალიფიკაციო საგამოცდო კომისია

მუხლი 22. საკვალიფიკაციო საგამოცდო კომისიის შექმნა და მისი უფლებამოსილება

1. საგამოცდო დავალებების შედგენის მეთოდოლოგიისა და მისი სირთულის დონის განსაზღვრის, დავალებების ბაზის მართვისა და ფორმირების, წერიტი დავალებების შეფასების კრიტერიუმების დადგენის, საკვალიფიკაციო გამოცდის მონაწილეთა ცოდნის შემოწმებისა და საკვალიფიკაციო გამოცდის შედეგების შეფასების მიზნით იქმნება საკვალიფიკაციო საგამოცდო კომისია.

2. საგამოცდო კომისია იქმნება საქართველოს იუსტიციის უმაღლესი საბჭოს მიერ 20 წევრის შემადგენლობით, რომელთაგან არანაკლებ 6 არის სისხლის სამართლის სპეციალისტი, 6 - სამოქალაქო სამართლის, 4 - ადმინისტრაციული სამართლის, 2 - საკონსტიტუციო სამართლის და 2 საერთაშორისო სამართლის სპეციალისტი.

3. საგამოცდო კომისიის წევრთა უფლებამოსილების ვადაა 3 წელი. გადაწყვეტილებას საგამოცდო კომისიის წევრის უფლებამოსილების შეწყვეტის შესახებ იღებს საქართველოს იუსტიციის უმაღლესი საბჭო.

4. საგამოცდო კომისიის შემადგენლობა ანონიმურია. საგამოცდო კომისიის წევრის მიერ ანონიმურობის ვალდებულების დარღვევა შეიძლება გახდეს მისთვის საგამოცდო კომისიის წევრის უფლებამოსილების შეწყვეტის საფუძველი. საგამოცდო კომისიის წევრს არ აქვს უფლება გაამჟღავნოს საგამოცდო დავალების შინაარსი. საგამოცდო კომისიის წევრის მიერ აღნიშნული ვალდებულების დარღვევა იწვევს საგამოცდო კომისიის წევრის უფლებამოსილების შეწყვეტას.

5. საკვალიფიკაციო საგამოცდო კომისია მის კომპეტენციას მიკუთვნებულ საკითხებზე გადაწყვეტილებას იღებს ხმების უმრავლესობით. ხმათა თანაბრად გაყოფის შემთხვევაში გადამწყვეტია კომისიის თავმჯდომარის ხმა.

6. საგამოცდო კომისიის წევრის საქმიანობა კომისიის უფლებამოსილების განხორციელების პერიოდში ანაზღაურებადია. საგამოცდო კომისიის წევრთან შრომით ხელშეკრულებას აფორმებს საქართველოს იუსტიციის უმაღლესი საბჭოსთან არსებული სსიპ - საერთო სასამართლოების დეპარტამენტი. შრომითი ხელშეკრულებით განისაზღვრება საგამოცდო კომისიის წევრის შრომის ანაზღაურება.

მუხლი 23. საგამოცდო კომისიის წევრობის პირობები

1. საგამოცდო კომისიის წევრი შეიძლება იყოს საქართველოს მოქალაქე, რომელსაც აქვს უმაღლესი იურიდიული განათლება არანაკლებ მაგისტრის ან მასთან გათანაბრებული აკადემიური ხარისხით, სპეციალობით პრაქტიკული მუშაობის არანაკლებ 5 წლის გამოცდილება. საქართველოს იუსტიციის უმაღლესი საბჭოს წევრი იმავდროულად არ შეიძლება იყოს საგამოცდო კომისიის წევრი.

2. საგამოცდო კომისიის წევრის საქმიანობა ითვლება სამეცნიერო-პედაგოგიურ საქმიანობად. საგამოცდო კომისიის წევრს უნდა გააჩნდეს კომისიის წევრის ფუნქციების განხორციელებისათვის საკმარისი კვალიფიკაცია, რაც დასტურდება სსიპ - შეფასებისა და გამოცდების ეროვნული ცენტრის მიერ გაცემული სერტიფიკატით.

3. საგამოცდო კომისიის წევრობის კანდიდატის დასახელების უფლება აქვს საქართველოს იუსტიციის უმაღლესი საბჭოს წევრს. თუ საქართველოს იუსტიციის უმაღლესი საბჭოს სხდომაზე საკითხის განხილვისას ორმა ან მეტმა კანდიდატმა ხმების თანაბარი რაოდენობა მიიღო, უპირატესობა მიენიჭება იმ კანდიდატს, რომელიც საქართველოს იუსტიციის უმაღლესი საბჭოს უფრო მეტი წევრის მიერ იყო დასახელებული, აქვს უფრო მაღალი სამეცნიერო ხარისხი, ან/და პრაქტიკული მუშაობის უფრო დიდი გამოცდილება.

მუხლი 24. საკვალიფიკაციო გამოცდის ორგანიზაციული უზრუნველყოფა

1. საკვალიფიკაციო გამოცდების ჩატარების მიზნით საგამოცდო კომისიის საქმიანობის ორგანიზაციულ უზრუნველყოფას ახორციელებს საქართველოს იუსტიციის უმაღლესი საბჭოს ადამიანური რესურსების მართვის დეპარტამენტი (შემდგომში - დეპარტამენტი).

2. დეპარტამენტს ევალება გამოცდების მოსამზადებლად აუცილებელი ყველა ორგანიზაციული საკითხის გადაწყვეტა, მათ შორის, გამოცდის ჩატარების მსურველთა განცხადებების მიღება, მათი საბუთების დადგენილ წესებთან შესაბამისობის შემოწმება, საგამოცდო დავალებების ელექტრონულ სისტემაში შეყვანა, საგამოცდო ინსტრუქტაჟის მომზადება და გამოსაცდელებისათვის გაცნობა, ვებ-გვერდზე გამოცდასთან დაკავშირებული ინფორმაციის, მათ შორის, საგამოცდო დავალებების ნიმუშების განთავსება და სხვა ტექნიკური დავალებების შესრულება.

3. დეპარტამენტის შესაბამის მოხელეს არ აქვს უფლება გაამჟღავნოს საგამოცდო დავალების შინაარსი. აღნიშნული ვალდებულების დარღვევა იწვევს საგამოცდო პროცესისგან მის ჩამოცილებასა და დისციპლინური პასუხისმგებლობის დაკისრებას.

მუხლი 25. საგამოცდო კომისიის თავმჯდომარე

1. საგამოცდო კომისიის ხელმძღვანელობს თავმჯდომარე, რომელსაც საგამოცდო კომისიის წევრთაგან ნიშნავს საქართველოს იუსტიციის უმაღლესი საბჭო.

2. საგამოცდო კომისიის თავმჯდომარე:

ა) უძღვება საგამოცდო კომისიის სხდომებს;

ბ) ზედამხედველობს დეპარტამენტის საქმიანობას;

გ) ისმენს დეპარტამენტის ინფორმაციას უშუალოდ გამოცდების მიმდინარეობის შესახებ;

დ) საგამოცდო კომისიის წევრებს აცნობს საგამოცდო დავალებების დადგენილ სტანდარტს და მათთან ერთად შეიმუშავებს წერითი ნამუშევრის შეფასების კრიტერიუმებს;

ე) ზედამხედველობს კომისიის წევრის მიერ შედგენილი საგამოცდო დავალების კომისიის სხვა წევრთა მიერ გადამოწმების პროცესს, ხოლო ხარვეზის აღმოჩენის შემთხვევაში უზრუნველყოფს დადგენილ სტანდარტებთან საგამოცდო დავალების შესაბამისობას;

ვ) უშუალოდ მეთვალყურეობს გამოცდების შედეგების შეფასების პროცესს;

ზ) საგამოცდო კომისიის შემადგენლობიდან ქმნის საპრეტენზიო ჯგუფს და ხელმძღვანელობს მის საქმიანობას;

თ) საგამოცდო კომისიის მიერ გამოცდების შედეგების დამტკიცების შემდეგ წარუდგენს ინფორმაციას საქართველოს იუსტიციის უმაღლეს საბჭოს.

მუხლი 26. საპრეტენზიო ჯგუფი

1. საკვალიფიკაციო გამოცდის შედეგების გადასინჯვის მიზნით იქმნება საპრეტენზიო ჯგუფი.

2. საპრეტენზიო ჯგუფის შემადგენლობას საგამოცდო კომისიის წევრთაგან განსაზღვრავს საგამოცდო კომისიის თავმჯდომარე.

3. ტესტური და წერითი გამოცდის შემდეგ მიღებული შეფასებით უკმაყოფილო გამოსაცდელი უფლებამოსილია განცხადებით მიმართოს საპრეტენზიო ჯგუფს მისი შეფასების გადასინჯვის მოთხოვნით. პრეტენზია მიიღება გამოცდის შედეგების გამოცხადებიდან ორი დღის განმავლობაში სპეციალურად ამისათვის გამოყოფილ ადგილას. დაგვიანებით შემოსული პრეტენზიები არ განიხილება.

4. ტესტური გამოცდის შეფასების გადასინჯვა, როგორც წესი, შესაძლებელია იმ შემთხვევაში, თუ გამოსაცდელმა დააგროვა სულ ცოტა 70 (სამოცდაათი) ქულა.

5. წერითი გამოცდის შეფასების შეჯამება, როგორც წესი, შესაძლებელია იმ შემთხვევაში, თუ გამოსაცდელმა დააგროვა სულ ცოტა 10 (ათი) ქულა.

6. საპრეტენზიო ჯგუფის შემადგენლობა ანონიმურია და შედგება 5 წევრისგან.

7. საპრეტენზიო ჯგუფის მიერ პრეტენზიის განხილვისას დაცულია ორმხრივი ანონიმურობის პრინციპი.

8. ტესტური და წერითი გამოცდის შედეგებზე პრეტენზიების განხილვისას საპრეტენზიო ჯგუფი საპრეტენზიო განცხადებაზე აკეთებს შეფასებას, რაც დასტურდება ჯგუფის წევრების ხელმოწერით. საპრეტენზიო განცხადებების გასწორებისა და იდენტიფიკაციის შემდეგ პრეტენზიების განხილვის შედეგები შეიტანება უწყისში და დასტურდება საკვალიფიკაციო საგამოცდო კომისიის თავმჯდომარის ხელმოწერით.

მუხლი 27. საკვალიფიკაციო გამოცდების შედეგები

1. საკვალიფიკაციო საგამოცდო კომისიის თავმჯდომარე საკვალიფიკაციო გამოცდების საბოლოო შედეგებს წარუდგენს საქართველოს იუსტიციის უმაღლეს საბჭოს.
2. პირები, რომლებმაც წარმატებით ჩააბარეს საკვალიფიკაციო გამოცდა, იღებენ სერტიფიკატს.

თავი IV

საკვალიფიკაციო გამოცდის უსაფრთხოების უზრუნველყოფა

მუხლი 28. საგამოცდო დავალებების განთავსება და მათ წვდომაზე უფლებამოსილ სუბიექტთა მოვალეობანი

1. საგამოცდო დავალებათა ბანკი, რომელიც სპეციალურად მხოლოდ საკვალიფიკაციო გამოცდისთვის იქმნება, უნდა განთავსდეს ცალკე სერვერზე.
2. ყველა პირი, რომელიც ჩართულია საგამოცდო დავალებათა შექმნასა და მონიტორინგის პროცესში შესაბამის დოკუმენტზე ხელმოწერით ადასტურებს გამოცდასთან დაკავშირებული ინფორმაციის გაუმჟღავნებლობას.
3. ელექტრონული სისტემის ტექნიკური გამართულობის, სისტემის ინსტალაციის/განახლების, მონიტორინგისა და ოპტიმიზაციის მიზნით სისტემაზე წვდომა აქვს სისტემის ადმინისტრატორს, სისტემის პროგრამული უზრუნველყოფის შექმნის, მოდერნიზაციის, პროგრამული კოდის რევიზიის/ოპტიმიზაციის/გაუმჯობესების, სისტემის განვითარებასთან დაკავშირებით ახალი ალგორითმისა და არქიტექტურის შემუშავების, უშუალოდ პროგრამირების პროცესთან დაკავშირებული საპროექტო დოკუმენტაციის შექმნის მიზნით - სისტემის პროგრამისტს, საგამოცდო ნაშრომებისა და პრეტენზიების შეფასების მიზნით - საგამოცდო კომისიის წევრებს, ხოლო საგამოცდო დავალებათა ელექტრონულ სისტემაში შეყვანისა და მიმდინარე საგამოცდო პროცესების მონიტორინგის მიზნით - დეპარტამენტის შესაბამის მოხელეს.
4. საგამოცდო კომისიის წევრი ვალდებულია შექმნას საგამოცდო დავალება დეპარტამენტის მიერ გადაცემულ ელექტრონულ მატარებელზე და გადასცეს უშუალოდ დეპარტამენტის შესაბამის მოხელეს.
5. დაუშვებელია, გარდა ამ წესის მიზნებისა, საგამოცდო კომისიის წევრის მიერ შედგენილი საგამოცდო დავალების შემდგომი გამოყენება.
6. ინფორმაციის გაუმჟღავნებლობაზე პასუხისმგებელი პირები ვალდებული არიან საგამოცდო კომისიის თავმჯდომარეს დაუყოვნებლივ შეატყობინონ ინფორმაცია კონფიდენციალური ინფორმაციის უნებართვო გამოყენების ან/და გამჟღავნების შესახებ.

მუხლი 29. საგამოცდო დავალებების გაცემა

საკვალიფიკაციო გამოცდაზე გამოყენებული საგამოცდო დავალებები არ არის საჯარო და არ გაიცემა.

თავი V

საკვალიფიკაციო გამოცდაზე გამოცხადების წესი და ზედამხედველობა გამოცდის მიმდინარეობაზე

მუხლი 30. საკვალიფიკაციო გამოცდაზე გამოცხადების დრო

1. საკვალიფიკაციო გამოცდის დღეს ყველა გამოსაცდელი უნდა გამოცხადდეს გამოცდის ჩატარების ადგილზე წინასწარ განსაზღვრულ დროს და გაიაროს რეგისტრაცია.

2. გამოსაცდელმა თან უნდა იქონიოს პირადობის დამადასტურებელი დოკუმენტი. წინააღმდეგ შემთხვევაში პირი გამოცდაზე არ დაიშვება.

3. დაგვიანებული პირები გამოცდაზე არ დაიშვებიან.

4. ტესტური გამოცდა დაიწყება რეგისტრაციის დამთავრებიდან არა უგვიანეს ერთი საათისა, ხოლო წერითი გამოცდა - რეგისტრაციის დამთავრებიდან არა უგვიანეს ორი საათისა.

მუხლი 31. საკვალიფიკაციო გამოცდაზე გამოუცხადებლობის შედეგები

1. საკვალიფიკაციო გამოცდაზე გამოუცხადებლობა პირს უფლებას ართმევს მოითხოვოს დამატებითი გამოცდის ჩატარება, მიუხედავად იმისა გამოცდაზე გამოუცხადებლობა საპატიო მიზეზით იყო გამოწვეული თუ არა.

2. საკვალიფიკაციო გამოცდაზე გამოუცხადებლობის შემთხვევაში გამოცდის საფასური არ ექვემდებარება დაბრუნებას.

მუხლი 32. საგამოცდო დარბაზში ადგილის დაკავების წესი

1. საგამოცდო დარბაზში შესვლამდე გამოსაცდელეები იღებენ ადგილის დაკავებისათვის განკუთვნილ დანომრილ ბარათებს, რომლის მიხედვით იკავებენ ადგილს საგამოცდო დარბაზში.

2. საგამოცდო დარბაზში ადგილის თვითნებურად დაკავების შემთხვევაში გამოსაცდელი მოიხსნება გამოცდიდან.

მუხლი 33. ინსტრუქტაჟი ტესტური გამოცდის დაწყებამდე

გამოცდის დაწყებამდე გამოსაცდელს უტარდება ინსტრუქტაჟი ელექტრონული პროგრამის გამოყენებისა და საგამოცდო დარბაზში ქცევის წესების შესახებ.

მუხლი 34. საგამოცდო დარბაზში შესვლის უფლება

საგამოცდო დარბაზში დაიშვებიან მხოლოდ გამოსაცდელეები და დეპარტამენტის მიერ სპეციალურად განსაზღვრული პირები, შესაბამისი სამკერდე მოწმობით (ბეიჯით).

მუხლი 35. საკვალიფიკაციო გამოცდიდან გაძევების შედეგები

საკვალიფიკაციო გამოცდაზე წესრიგის დარღვევის გამო გამოსაცდელის გაძევების შემთხვევაში მას უფლება არა აქვს მონაწილეობა მიიღოს მომდევნო საკვალიფიკაციო გამოცდაში.

მოსამართლეობის საკვალიფიკაციო საგამოცდო პროგრამა

ნაწილი I. შინაარსი

1. საქართველოს საკონსტიტუციო სამართალი.
2. სისხლის სამართალი.
3. სისხლის სამართლის პროცესი.
4. სამოქალაქო სამართალი.
5. სამოქალაქო საპროცესო სამართალი.
6. ადმინისტრაციული სამართალი.
7. ადმინისტრაციული სამართლის პროცესი.
7. ადამიანის უფლებათა საერთაშორისო სამართალი.

ნაწილი II. საქართველოს საკონსტიტუციო სამართალი

თემა I. საქართველოს კონსტიტუცია.

თემა II. საქართველოს პარლამენტის დადგენილება „საქართველოს სახელმწიფოსა და საქართველოს სამოციქულო ავტოკეფალურ მართლმადიდებელ ეკლესიას შორის“ კონსტიტუციური შეთანხმების დამტკიცების შესახებ.

თემა III. საქართველოს ორგანული კანონი „საქართველოს მოქალაქეობის შესახებ“.

თემა IV. საქართველოს ორგანული კანონი „საერთო სასამართლოების შესახებ“.

თემა V. საქართველოს ორგანული კანონი „საკონსტიტუციო სასამართლოს შესახებ“.

თემა VI. საქართველოს კანონი „საკონსტიტუციო სამართალწარმოების შესახებ“.

თემა VII. საქართველოს კანონი „ნორმატიული აქტების შესახებ“.

თემა VIII. საქართველოს კანონი „ადვოკატთა შესახებ“.

თემა IX. საქართველოს სამოსამართლო ეთიკა.

თემა X. საქართველოს კანონი „უცხოელთა სამართლებრივი მდგომარეობის შესახებ“.

თემა XI. საქართველოს ორგანული კანონი „რეფერენდუმის შესახებ“.

თემა XII. საქართველოს პარლამენტის რეგლამენტი.

თემა XIII. საქართველოს ორგანული კანონი „მოქალაქეთა პოლიტიკური გაერთიანებების შესახებ“.

ნაწილი III. სისხლის სამართალი

თემა I. საქართველოს სისხლის სამართლის კოდექსი.

თემა II. არასრულწლოვანთა მართლმსაჯულების კოდექსი.

ნაწილი IV. სისხლის სამართლის პროცესი

თემა I. საქართველოს სისხლის სამართლის საპროცესო კოდექსი.

თემა II. საქართველოს კანონი „პატიმრობის შესახებ“.

თემა III. საქართველოს კანონი „ოპერატიულ-სამძებრო საქმიანობის შესახებ“.

თემა IV. საქართველოს კანონი „სისხლის სამართლის საერთაშორისო სასამართლოსთან საქართველოს თანამშრომლობის შესახებ“.

თემა V. საქართველოს კანონი „სისხლის სამართლის სფეროში საერთაშორისო თანამშრომლობის შესახებ“.

თემა VI. საქართველოს კანონი „არასაპატიმრო სასჯელთა აღსრულების წესისა და პრობაციის შესახებ“.

თემა VII. საქართველოს კანონი „პოლიციის შესახებ“.

ნაწილი V. სამოქალაქო სამართალი

თემა I. საქართველოს სამოქალაქო კოდექსი.

თემა II. საქართველოს კანონი „მეწარმეთა შესახებ“.

თემა III. საქართველოს კანონი „საერთაშორისო კერძო სამართლის შესახებ“.

თემა IV. საქართველოს ორგანული კანონი „საქართველოს შრომის კოდექსი“.

თემა V. საქართველოს კანონი „საავტორო და მომიჯნავე უფლებების შესახებ“.

ნაწილი VI. სამოქალაქო საპროცესო სამართალი

თემა I. საქართველოს სამოქალაქო საპროცესო კოდექსი.

თემა II. საქართველოს კანონი „გადახდის უუნარობის საქმის წარმოების შესახებ“.

თემა III. საქართველოს კანონი „არბიტრაჟის შესახებ“ .

ნაწილი VII. ადმინისტრაციული სამართალი

თემა I. საქართველოს ზოგადი ადმინისტრაციული კოდექსი.

თემა II. საქართველოს კანონი „საჯარო სამსახურის შესახებ“.

თემა III. საქართველოს ორგანული კანონი „ადგილობრივი თვითმმართველობის კოდექსი“.

თემა IV. „საჯარო რეესტრის შესახებ“ საქართველოს კანონი.

ნაწილი VIII. ადმინისტრაციული საპროცესო კოდექსი

თემა I. საქართველოს ადმინისტრაციული საპროცესო კოდექსი.

თემა II. საქართველოს ადმინისტრაციულ სამართალდარღვევათა კოდექსი (კარი I, III, IV).

თემა III. საქართველოს საგადასახადო კოდექსი (კარი I, XI, XIII, XIV).

თემა IV. „სააღსრულებო წარმოებათა შესახებ“ საქართველოს კანონი.

ნაწილი VIII. ადამიანის უფლებების შესახებ საერთაშორისო აქტები და საქართველოს საერთაშორისო ხელშეკრულებები

თემა I. ადამიანის უფლებათა საყოველთაო დეკლარაცია.

თემა II. საერთაშორისო პაქტი ეკონომიკური, სოციალური და კულტურული უფლებების შესახებ.

თემა III. საერთაშორისო პაქტი სამოქალაქო და პოლიტიკური უფლებების შესახებ და მისი ფაკულტატური ოქმი.

თემა IV. ევროპის კონვენცია ადამიანის უფლებათა და ძირითად თავისუფლებათა დაცვის შესახებ და მისი დამატებითი ოქმები, ევროპის ადამიანის უფლებათა სასამართლოს მიერ მიღებული შემდეგი გადაწყვეტილებების მიხედვით:

ა) ასანიძე საქართველოს წინააღმდეგ;

ბ) იდენტობა საქართველოს წინააღმდეგ.

თემა V. საერთაშორისო მართლმსაჯულების სასამართლოს სტატუტი.

თემა VI. გაეროს ბავშვის უფლებათა კონვენცია.

თემა VII. გაეროს გენერალური ასამბლეის რეზოლუციით დამტკიცებული „სასამართლო სისტემის დამოუკიდებლობის ძირითადი პრინციპები“ (1985 წელი).

თემა VIII. მოსამართლეთა ქვევის ბანგალორის პრინციპები (2002 წელი).

თემა IX. სამოქალაქო, საოჯახო და სისხლის სამართლის საქმეებზე სამართლებრივი ურთიერთდახმარებისა და სამართლებრივ ურთიერთობათა შესახებ (მინსკის კონვენცია 1993 22 იანვარი).

დამატებით, სისხლის სამართლის დარგში სპეციალიზაციისას:

თემა I. სისხლის სამართლის საერთაშორისო სასამართლოს წესდება (რომის სტატუტი).

თემა II. გაეროს კონვენცია „წამებისა და სხვა სასტიკი, არაადამიანური ან ღირსების შემლახავი მოპყრობის და დასჯის წინააღმდეგ“.

თემა III. ევროპული კონვენცია მსჯავრდებულ პირთა გადაცემის შესახებ.

თემა IV. ევროპის კონვენცია ადამიანის უფლებათა და ძირითად თავისუფლებათა დაცვის შესახებ და მისი დამატებითი ოქმები, ევროპის ადამიანის უფლებათა სასამართლოს მიერ მიღებული შემდეგი გადაწყვეტილებების მიხედვით:

- ა) შამაევი და სხვები საქართველოს წინააღმდეგ;
- ბ) ენუქიძე და გირგვლიანი საქართველოს წინააღმდეგ;
- გ) ლავთაძე საქართველოს წინააღმდეგ;
- დ) მინდაძე და ნემსიწვერიძე საქართველოს წინააღმდეგ;
- ე) ბელელური და სხვები საქართველოს წინააღმდეგ;
- ვ) აშლარბა საქართველოს წინააღმდეგ.

დამატებით, სამოქალაქო და ადმინისტრაციული სამართლის დარგში სპეციალიზაციისას:

თემა I. ევროპის სოციალური ქარტია.

თემა II. უცხო სახელმწიფოთა საარბიტრაჟო გადაწყვეტილებების ცნობისა და აღსრულების შესახებ ნიუ-იორკის 1958 წლის კონვენცია.

თემა III. ევროპის კონვენცია ადამიანის უფლებათა და ძირითად თავისუფლებათა დაცვის შესახებ და მისი დამატებითი ოქმები, ევროპის ადამიანის უფლებათა სასამართლოს მიერ მიღებული შემდეგი გადაწყვეტილებების მიხედვით:

- ა) საფეხბურთო კლუბი მრეტები საქართველოს წინააღმდეგ;
- ბ) ჯუღელი და სხვები საქართველოს წინააღმდეგ;
- გ) კლაუს და იური კილაძეები საქართველოს წინააღმდეგ;
- დ) ნ.წ. საქართველოს წინააღმდეგ;
- ე) გ.ს. საქართველოს წინააღმდეგ;
- ვ) სალინაძე და სხვები საქართველოს წინააღმდეგ.